

LXII


27 Februari 1963

Dr. J. Hartog
Wilhelminastraat
Oranjestad



OBSERVADOR


Semanario Informativo  Netamente Arubiano



Enid Marugg
Reina
di
Carnaval
1963



Noticianan local



ENID MARUGG
Reina di Carnaval 1963

CARNAVAL 1963 TA PERTENECE NA PASADO

Carnaval 1963 ta pertenece na pasado.

Durante e ultimo dianan a worde elegi un Reina di Carnaval, y a worde teni dos parada fulminante, un na San Nicolas y un na Oranjestad. E tempo entre e tres eventonan culminante aki, a worde yená cu un numeroso cantidad di fiesta, un mas animá cu otro, pero tur tumando lugar den e ambiente agradable di Carnaval.

Desde varios siman tabata worde teni fiesta caba den tur e clubnan, pero un Carnaval sin Reina no ta Carnaval y p'esey nos ta considera cu e Carnaval di Aruba mes a cuminsa Diabiernes anochi den Wilhelmina Stadion cu un acto, cual, den nos parecer, no tin su igual den e ocho añanan, cu Aruba ta celebrando Carnaval publicamente.

E acto den Wilhelmina Stadion no tabata perfecto y claro cu tin remarque, pero esey no ta kita ningun momento e merito di e Carnaval Co-

mité. Nos ta haya cu e musica no tabata suficiente animadora, pasobra pa bon cu Los Casinos, Los Caciques of Los Romanceros ta, nan no ta ofrece e musica apropiado pa Carnaval.

Ideal lo tabata si e steelband Jainboree, cu a worde organizá un siman promer door di Y.M.C.A., por a worde combiná cu e eleccion di Reina di Carnaval den Wilhelmina Stadion.

Sinembargo e mas cu 2000 personanan, cu a colma e tribunanan di Stadion, a goza di un anochi de lo mas agradabel.

Un jurado completamente imparcial a eligi Enid Marugg como Reina di Carnaval 1963 di Aruba. Y kende lo duda di e decision di e jurado ora nan mira por ehemplo e portret di Enid, cu ta aparece e biaha aki riba e portada di "Observador".

Naturalmente riba e portada di "Observador" no ta aparece henter e figura di Enid, pero e personanan cu mira e cara, por imagina facilmente ki figura esbelta mester pertenece na e cara ey.

Enid Marugg ta un di e apariencianan, cu ta inspira e efusionnan mas lirico di cualquier poeta, cu ta pone e poetanan yega den e esferanan angelical y esun cu no reconocé lo justo di e decision di e jurado, esey falta gusto, esey falta e facultad pa



"ANZOATEGUI"
E flota original 1963

reconoce lo mehor den un grupo of esey ta un mal perdedor.

Y nos ta contento, pasobra, cu excepcion di algun, henter Aruba a sintié feliz cu Enid Marugg como Reina di Carnaval 1963 di Aruba.



Elmar a destacá e aña aki durante e parada di Carnaval cu un bunita flota comercial.